

EVOUULUN

A quel estùdi se prepauso de cerca, dins la region que vendrié pièi Prouvènço, li biais qu'aguèron lis ome pèr s'assousta, dempièi li tèms pre-istouri e l'evoulun de soun abitage au fièu di milenàri enjusu'aro.

S'agis pas d'un estùdi saberu toucant la Prouvènço antico, mai simplamen d'assaja de mies couneisse li relicle recata dins lou terraire nostre e tambèn dins lou relarg proche que saren ana vesita.

Estùdi mena pèr la Clapouiro, escolo felibrenco, seicioun « Provençal » dóu C.D.C.,

Souto la beilié de Mirèio Barême

An participa à l'alestimen dóu libret : Camihe Barême

Louis Mathieu

Ramoun Michel

AU paleolithi, dins la tempouro dicho dóu mousterien, se retrobo la marco d'ome que visquèron à l'entour dóu Ventour, dins la valado d'Ouveso (baumo de la masco)dins la n-auto valado de la Nesco, e dins aquelo dóu Calavoun.

Leberoun a tambèn assousta aquelo civilisacioun subretout dins lou valoun de l'Aigo-brun que, de tout segur, sis aigo rajavon mai aboundouso que vuei.Lou valoun es enqueissa entre dous bàrri ribassu que fan dóu valoun uno gorgo espetaclouso.lou draïdu que n'en permet la vesito serpentejo entre-mitan dis avaus, di bouis gigant e di tihòu.e ribejo lou rièu que cascaiejo en cascado miniaturu ; à rode,semblo que dort dins de pichot plan de l'aigo lindo. Es meravìho de vèire lou rièu tant clar.

Lis ome de l'epoco èron subretout cassaire, siegue pèr assegura sa nourriture, siegue que,couchant la feruno qu'òcupavon li baumo, voulien faire siéu lis abri ansin counquista. Trouvavon aqui li peirard que ié fasien mestié pèr adouba sis óutis emai sis armo.

Dins li baus dóu valoun soun cavado de deseno de baumo e, de mai, noumbrouso soun lis avançado de roucas que serviguèron pèr abri. La mai espetaclouso se pòu vèire long dóu camin que meno à Fort de Buous, lou roucas fai coume un envans que soun bord es à 35 metre dóu baus. L'abri cuerb uno surfàci d'aperaqui 800 metre carra.

La baumo di peirard en amount de l'amèu di Seguin es tambèn forço couneigudo parié coume la baumo de Buous ounte s'es trouva en abounde d'oussamen e de peirard taia.

L'epoco proto-istourico recuerb uno tempouro que vai de 2000 à aperaqui 1000 an davans Jèsu. Lis ome an sourti de la pre-istòri; reston plus tant proche lou baus que lis assoustavo, n'an plus de besoun aro que sabon se basti d'oustau de pèiro ligado.

Parieramen se podon aliuencha de la mountagno que i'adusié li peirard pèr sis óutis e sis armo. Sabon travaia l'argielo mai tambèn li metau, sabon faire de coumèrci e d'escàmbi.

Sus lis auturo bastisson de fourtificacioun simplo, li castellas o castellaras (opida)

Acò se fai long di draio de passage, esvartant li baisso palunenco e lis escalado que sarien trop alassanto. Eron pas fa pèr ié vièure de longo mai rèn soulamen, toumbant lou cas, se i'assousta.

Li Ligour que vendran après ié vivran, éli, e ié restaran long-tèm.

Au siècle quaternaire, la région connue d'envahisseurs, les Celtes que, dans un autre temps occupèrent tout le pays. Dans d'autres régions, les Ligures se déléguèrent en plein dans la nouvelle civilisation ; dans d'autres régions, formèrent une multitude de confédérations de tribus celto-ligures, que dans notre région prévalait le nom de Sali.

Les Sali eurent deux capitales ; Arles (Arle) et Entremont que fut la ville la plus importante, bâtie sur un plateau au-dessus de deux collines d'un côté de rochers et d'un autre côté de remparts de murailles. Es un plan de construction que se retrouve dans toutes les cités (oppida)
La civilisation salienne se peut lire dans les sites d'anciennes cités et dans les sanctuaires comme Roco-Pertuso et le Caisso de Servan à Mouries.

A Entremont, la ville basse a d'habitations petites et un seul membre, dans le canton un cros par le grand et le gerle d'olive. S'y trouve également la pierre, puis un moulin et un esgrèuraduro par écrasement des olives.
La ville haute recata les granités, le sanctuaire et d'ouest au nord. Le carrefour et le placet sont bardés. Dans le carré-fourc, le mur des vestiges sont un peu arrondis par les passages des chariots.
Long de la draille sacrée que même au sanctuaire s'en trouva d'édifices de la religion salienne.

La ville est un modèle pour l'organisation, même rien n'en est encore prévu pour les âges de plume ou les âges gaulois, que devaient être en bas deux barrières.

BUOUS

Ancien ruisseau monte au nord trouve en abondance de reliques du passé et souvent fait d'un passage forcé alluvionnaire, s'y trouve en plein cœur de Leberon dans la vallée de l'Aigo-Brun. Le ruisseau sourdait sur le plateau de Claparedo, après d'agué ; dans de temps bien lient arrière, cava de baume et taie de ses âges poudereux de gorges très belles.

L'Aigo-Brun est plus rien, vu, qu'un petit ruisseau bien tranquille.

Lou rode couneiguè à de rèng tóuti lis age de la vido dis ome dempièi la coumençanço dins li tèms pre-istouri, passant pèr li Ligour, li Sàli, pièi li Rouman e lis estajan de l'age mejan.

A la debuto dóu crestianisme, de mounge ié visquèron dins d'ùni baumo quiha-do mita camin dóu Baus.

Lou fort éu meme couneiguè de fourtuno diverso pèr, fin finalo, èstre desma n-tela e quasi aclapa sus ordre de Louis lou quatorgen.

Dins la vesito dóu rode, adounc, coustejaren, un pau entre mesclado li soubro leissado à cado epoco pèr li civilisacioun que l'ócupavon.

La baumo de Buous fuguè ócupado tre li tèms li mai ancian, siegue pèr abri, siegue pèr sepòuturo.

Se pòu vèire à drecho de la baumo uno meno de bacin cava dins lou ro e un sarcofage.

D'aquí la visto es espetaclouso sus l'esperoun roucassous mounte aubourèron lou vilage proto-istouri, la cièuta de l'age mejan e la fourtaresso. Fai mestié de ramenta que lou rode èro requisit pèr faire liame entre li valado de Durènço e, de l'autro man de la mountagno, dóu Calavoun.

Parèis au tout impoussible de se gandi eilamount sus l'esperoun. Lou bas de roco lisso, aut de mai de cènt metre, davalo soude sus la valado. Sèmblo qu'es un pau à devinoun-devinaio dque fau destria lou camin dins aquéu rode tant ribassu e pamens.....

Pamens, es bèn un eiretage di Ligour aquelo draio que nous vai mena sus l'oppidum traça dins la pèiro ; escalo en cournisso long de la paret. Fuguè fa dins l'estiganço de rendre poussible i càrri de mounta au planestèu.

Se pòu vèire li roudan que, à la longo dóu tèms, ié leissèron.

Lou camin viro davans un bastioun mounta à pèiro seco que sèmblo veni, éu, de l'age mejan. En aquelo epoco la draio venguè camin saunié, après qu'aguèsson basti uno porto que, soulet li miòu la poudien franqui e noun pas li càri.

Lou camin pièi perseguis sa mountado en làrgis escalié fin de lou rendre mai eissa pèr li miòu. Sus lou planestèu retribaren li mèmi roudan fa pèr li càrri ancian.

La porto bastido à l'age mejan que sian arriva davans es la souleto que dounavo intrado sus l'oppidum. Dato, prouvable, dóu siècle tregen.

Just à coustat dóu bastioun medievau poudèn vèire tres abitacioun rupèstro.

Coume l'avèn di adès, li civilisacioun o pulèu li soubro di civilisacioun eici se coustejon.

L'iero dóu fort a uno estendudo forço impourtanto e, en mai de la visto espetaclouso sus la valado de l'Aigo-broun e lou valoun di Serre, es semenado d'entresigne precious : lou bàrri, la bestourre, oubrage de defenso pèr l'ensemble vilage-fourtaresso, parié coume la trencado que barro lou planestèu dins sa larjour.

Dos cisterno baumeludo e prouvable tapado, reculissien lis aigo de pluèio. Dóumaci la pendo lóugiero dóu sòu e lis esgrèuraduro que ié tracèron.

Un bastioun venié s'ajougne à-n-aquéu sistemo de defenso. Passa aquéli defenso, es un vaste espàci pèr li culturo que s'expandis. Proun grand, ié fasien de tout segur de cerealo.

S'atrobo plus liuen d'àutri soubro d'abitacioun proto-istourico .6 renguiero de muraio paralelo aparavon encaro lis abitacioun, qu'èron que d'oustau pichot em'un soulet membre, souvènti fes, dins un cantoun un cros pèr li reservo de nourrituro.

Muraio de defenso e oustaloun soun mounta à pèiro seco, que vènon, semblarié, dóu vilage primitièu de Buous e que soun estado re-utilisado.

Un pau plus aut, la glèiso que fuguè aubourado pèr li gènt dóu vilage de l'age mejan e noun, coume se poudrié crèire, pèr aquéli qu'ócupavon la fourtaresso. Se vèi clar encaro, l'absido e li grand porto aro muraiado.

Dins un oustaloun proche la glèiso se pòu vèire uno cabano emé dous cros reüni soutu lou mur.

Sus uno pichoto terrasso, es un vintenau de cros que soun reuni ; cava dins lou ro, de dimensioun despariero, tóuti pamens soun pansu, prefouns d'aperaqui 2 metre. La duberturo es proun larjo, 1 metre,50 à 2 metre,25 ;Soun tapa d'un sistemo bèn estigança fa d'un anèu de pèiro que se pòu leva e d'un tap tambèn mouvedis. Acò dounavo dos dimensioun à l'uberturo.

Venènt de l'epoco proto-istourico, soun tóuti cava en deforo de la fourtaresso; à l'age mejan fuguèron plus utilisa.

Dins lou group d'abitacioun proche li cros, que tóuti soun d'un soulet membre, se n'atrobo uno, mai bello, mai grando, de dous membre.

La porto d'intrado marco uno couneissènço prefundo de l'architeituro que fai souspresso e d'un mestrige prefouns.

Un proumié valat aparò l'intrado dins la fourtaresso ; aquéu valat poudrié èstre tambèn uno reservo pèr lis aigo. Barro lou planestèu sus touto sa larjour, aperaqui 30 metre.

Darrié lou proumié bàrri, un segound valat aparò uno muraio auto emé dins lou mitan uno toure carrado de tres estànci trencado d'aubarestiero.

Un tresen bàrri barro l'esperoun dins soun poun lou mai estré, aperaqui 16 metre.

La darriero defenso, l'aubourèron après lou tresen valat ; es un tourrihoun que si mur soun basti à l'aploumb dóu baus d'uno founsour de 70 metre.

Darrié lou tourrihoun, un autar, taule de sacrifice, em'uno regolo ounte rajavo lou sang di vitimo que dato, prouvable, de la proto-istòri.

Revenèn tournamai sus la pichoto terrasso di cros.

Vesinant emé l'oustau que soun architeituro es forço evoulunado, quàuquis oustau o pulèu abri, fuguèron cava dins lou roucas ; forço prefouns representon un travai impourtant e semblarié que soun esta ócupa enjusqu 'au siècle segen. D'àutri semi-rupèstre avien deja uno meno d'enfustage.

S'avisaren d' escalié que, après la pusterlo davalon rede dins la valado. Lis escalié soun traça dins la roco e an la particularita que, dóu valoun, meme de proche,degun noun li pòu vèire. Soun taia d'un biais tau que toujours un pan de mur lis escound à la visto di gènt que passarien dins lou draïou que serpentejo dins lou valoun.

Pèr esplico s'es di que d'aquélis escalié tant rede mountavon en proucessioun vers l'atar pèr lou culte d'un dièu descouneigu.

O, poussible, fin de pousqué s'escapa e grata pinedo en cas de mau-parado.

Tambèn s'es di , fin de prendre d'à rebous,lis ennemi.

Lis idèio soun pas de manco, pamens de provo n'en sian sènso.

Nous sara permés de cita Pèire Pessemesse, conse de Buous pèr acaba noste prepaus toucant l'oppidum de Buus.

« *Lou fort de Buous , aquéu que vuèi n'en vesès li rouino,desmantela que fuguè pèr Louis lou quatorgen, aguè soun ouro de glòri dins un tèms ufanous que lou Leberoun fasié bàrri entre la Coumtat e lou marquesat de Prouvènço.*

Un fort que dóu mai vai, dóu mai atiro li gènt que lou dimenche poplon lou Leberoun coume dins lou tèms, fai un... dous... tres milo an. »

LI CAISSO SANT JAN

Lou site que vuei nous interesso s'atrobo à dous kiloumetre e mié dóu vilage de Mouriés, au founs d'uno coumbo que dos rancaredo proun auto la bordon dóu levant au pounènt ; de mai la coumbo es barrado vers lou levant d'uno clau roucassouso.

Li tros de pèiro taiado que destousquèron dounèron lèu de pensa que lou rode fuguè de toustèms couneigu e que l'ome lou trevè tre li tèms pre-istouri, encaro dins lou proumier age dóu ferre, dóu siècle seten au siècle cinquen davans l'ero nostro e, sènso countèsto, dóu tèms di Ligour e à la debuto dóu siècle segound pèr li counfederacioun saliano.

La coumbo representavo un abitage de segureta, li baus proun autn aparavon dis envahissèire poussible ; de mai, d'en aut di cresten èro eisa de gueira l'aprocho dis ennemi.

D'aigo sourgentavo dins la coumbo, ço que rendié pouossible un abitage de durado, au countràri d'àutri castellaras que noun poudien servi que dins lou cas de mau-parado e pèr gaire de tèms.

La coumbo se presento un pau coume un grand reitangle. Apara de tres coustat pèr li baus e la clau roucassouso, un soulet coustat vers lou pounènt s'atrouvavo sènso prouteicioun.

Uno plano pau o proun palunouso s'espandis davans e lis estajan aubourèron de muraio spesso. La mai spesso e la mai impourtanto fuguè acoumpagnado d'escalapas de roucas plaça, dirias, en boutisso. Entre li muraio cavèron de trencado. Uno souleto porto d'intrado èro amenajado dins lou bàrri fin de rendre mai eiado la survihanço.

Li Ligour que restèron aqui dins lou rode fasièn de coumèrci emé li populacioun de la ribo de mar, la provo n'es li peço de mounedo qu'an trouva, de peço massalioto.

Maugrat que siegue enqueissa dins la coumbo, l'oppidum s'atrouvavo dins un liò de passage, siegue vers li vilo proche la mar, siegue au travès dis Aupiho .

Adounc sa situacioun se capitè forço impourtanto.

Touto la superficìo de la coumbo èro cuberto de coustrucioun. Tenié apearai un eitaro e mié. D'embaso d'oustaloun soun estado dessousterrado meme sus l'auturo.

Aquéli coustrucioun se saup que cabussèron mai que d'un cop e que li materiau que n'èron bastido fuguèron utiliza tournamai pèr d'àutri bastisso coume li cercaire se n'en soun avisa.

Lis oustau èron fa de mur de tàpi e de brico de terro secado au soulèu que en francés ié disèn « adobe ». Li mur s'aussavon sus de fundamento de pèiro seco. Lou sòu e li mur èron recubert d'argiello fino e li téulisso de branco. Pèr faire empacho is aigo de pluèio de s'enfusa dins li membre, lissavon lou brancun emé d'argiello e, fasièn acò tant de cop qu'èro necite.

Pèr moble avien soulamen de banqueto de pèiro. Pèr serva lou gran e l'òli utilisavon de gràndi gerlo de terro, li « dolia ».

Se saup pamens que, vers lou siècle segound, à l'aflat di gre que n'avien couneigu lou biais de basti lis oustau ,coumencèron d'agué de téulisso garnido de pèiro plato liogo dóu brancun.

Aquéli pèiro plato èron ressado de formo de téule e se soun rescountrado tournamai empregado dins li siècle venènt.

Uno causo d'impourtànci s'es trovado sus lou site di Caisso, de pieloun de pèiro taiado emé de dedau e de gravaduro que representavon de chivau emé si cavalie o sènso. Acò se rescontro tambèn sus d'àutris oppidum dóu meme tèms mai alor , se ié vèi pas de dessin de chivau.

Aquelo particularita faguè qu'i Caisso de Sant Jan, ié dison : oppidum equèstre. »

La bastisso la mai impourtanto s'atrovo au pèd dóu baus ; es uno meno de reitangle que mesuro 14metre 45 sus 3 metre 40.

Li mur an uno embaso bastido à pèiro seco ; ges d'estànci. La téulisso es pourtado pèr un enfustage mantengu pèr de gros clavèu farga.

Dedins la salo uno banqueto court long di tres paret, es facho de pichot blot de pèiro recubert d'argiello jauno.

Semblarié que fuguèsse estado bastido dins l'estiganço de ié teni d'assemblado, la banqueto aguènt usage de sèti. Sèmblo bèn que fuguè salo couleitivo pulèu que abitacioun.

Souto l'envans dóu coustat dóu levant, s'es de tout segur fa de fiò, mai pas de longo Li soubro an bèn moustra de fougau mai que fuguèron pas de durado.

LOU MOUNT PAVOUN

Lou mount Pavoun s'aubouro de si bèu 230 metre au dessus de la plano entre lou mas d'Estoubloun vers Font Vièio er lou mas d'Aujo vers lou pendis ubagous, en avans dis Aupiho.

Lou site dóu Pavoun quouro lou vesès de la plano sèmblo li rouino d'un castèu fourtifica. La mountado pèr jougne la cimo es pas trop alassanto subretout à la debuto enjusquo lou coulet avans d'escarlimpa de roucas en roucas vers li cresten. D'en aut, la visto s'expandis vers li baus... touto la planuro... lou Vacarés esblèugissènt... e de l'autre caire s'entre devinon li cimo di Ceveno.

Lou rode sèmblo qu'èro bèn chausi pèr se i'assousta. Vers l'uba, lou pendis davalo soude La colo fasènt bàrri d'esperelo. aparavo contro d'envahissèire de touto meno.

Lis avejaire saberu defauton un pau toucant lou site dóu Pavoun, mancan d'entresigne serious sus la vido que, eici, se debanè. Pamens avèn pensa que s'atrouvavian dins un rode que fuguè couneigu, treva, abita, dempièi d'epoco forço aliuenchado.

Dòu coustat que lou pendis es pas tant ribassu, an basti de muraio d'encencho mountado à pèiro seco. Se n'en pòu vèire li soubro encaro vuei. Faciant lou miejour , d'oustau fuguèron amenaja , d'ùni cava dins lou roucas se coumpletavon , proubable, d'envans de bos e de brancun.

Eron forço pichot. Souvènti fes se pòu destria rèn qu'un soulet membre.

Pamens se pòu devina d'eici, d'eilà, dins un cantoun de l'oustau , de pèiro cava-do pèr recebre lis aigo de pluèio. Se vèi clar li pichòti regolo que reculissien lis aigo e li menavon vers lou cros taia dins lou roucas.

Se vèi tambèn la marco d'uno gandolo que fai lou tour dóu cros, provo que metien, dessus lou cros uno lauso que lou tapavo, fin d'engarda l'aigo d'èstre counchado.

Dins d'oustaloun esparpaia sus lou pendis, se vèson encaro de meno d'estagiero que fuguèron traçado dins la roco, dins l'espès de ço qu'èro lou mur, proubable pèr lou renjamen dis eisino necito à la vido vidanto.

La plaço pèr renja la gerlo es tras que bèn marcado. A just e just la formo de la gerlo.

S'espacejant pèr lou draïou, s'avisan lèu que lis oustaloun soun en nombre.

Toujour faciant lou miejour an escala lou pendis e se souleiavon bèn à la calo dóu mistrau que, en aut, se descadeno.

Leissan lis oustalou arrenqueira long dóu draïou e countunian nosto vesito.

Entre arriva au bout de la mountado ; es lis escalié, dirias d'ounour, que vous aculisson.

Mènon tout en aut dóu cimèu, aqui que s'atrovon li soubro d'uno capello. Es tout vist que lou rode decessè pas d'èstre couneigu, treva, abita, coume d'aiour dins la majo part dis « oppida » couneigu, long-tèmès après que lis estajan proumieren se fuguèsson esvali.

Se penso que, pendènt l'age mejan, lis estajan de Font Vièio, que soun vilage es forço proche, ié venien s'assousta dins la mau-parado.

De cade coustat dis escalié , parié coume dins lis oustaloun, de cros fuguèron cava fin de reuli lis aigo de pluèio. Acò se fasié pèr lou mouien d'un sistemo de pichòti gandolo que regoulavon de roucas en roucas.

Es verai que l'aigo èro de tout segur de manco sus l'auturo, meme se, dabas, rajavon de sourgènt.

Se pòu pensa que lou rode èro pas abita de countùni ; poussible que li gènt ié venguèsson rèn soulamen pèr ié trouva la sousto, uno passado.

Dins l'absido arredounido de la capello antico, parieramen fuguèron cava d'estagiero, coume tambèn sus lou coustat.

De mai, un banc dins l'espès dóu roucas que fai bàrri au mistrau e ounte fai bon de se pausa un moumen, ; bèn à la calo, subretout quouro pèr jougne la cimo,avès fa targo au vènt terrau que, au moume,n que traucas sus l'esplanado vous coupo l'alèn.

E, ansin, poudès à lesi remira lou païsage meravihous que s'expandis alentour.

SANT BLASI

Lou noum fuguè baia aperaqui vers lou siècle segen, Sant Blàsi estènt un sant martire crestian de l'an 300. S'èro apela dins lou debana de soun istòri Ugium o Mastrabala.

L'oppidum es basti coume soun tóuti, dins un rode que sarié pièi eisa de l'apara se besoun n'èro.

S'atrobo sus un esperoun roucassous ; la colo ribassudo ié fai bàrri davans lis estang dóu Pourra e de Citis au levant, de l'estang de la Vau d'U, au pounènt.

Es encencha de renguiero de muraio que se jounon vers lou miejour fourmant uno clau de prouteicioun que vèn bara l'esperoun.

Lis ome di tèms neouliti ócupavon deja l'endré, acò es afourti pèr la muraio priitivo facho de blot enorme de roucas desparieramen taia, que datarien dóu siècle seten.

Li blot grandaras soun de formo de paralelepipède e soun assembla sènso mourtié ; soun plaça en long, aleva de quàuquis un que soun mes en boutisso.

Davans li soubro d'un bàrri que devié s'aussa d'aperaqui 2 metre, 50, se vèson de meno de pieloun dóu su arredouni que, antan, merletavon lou aut dóu grand bàrri.

Aquéli bàrri sarien la provo que de gré trevavon lou rode de tèms avans la foundacioun de Marsiho e que lou pousquèron amenaja pèr, proubable, n'en faire de relais coumerciau sus la routo de la sau e de l'estam. Lou rode estènt deja ócupa, se pòu pensa que s'amiguèron emé li proumies estajan , subretout dins la debuto.

Dins lou siècle sièisen, pensèron que venié necite de basti un sistemo de defenso. Dins lou siècle quaten lou castellaras venguè cièutadello greco.

Dins la vilo basso lis oustaloun carra que, pèr resoun d'ecounoumìo li mur soun fa de dos renguiero de pèiro em'un remplissage de terro entre mitan se pòu remarca dins la carriero principalo uno bourdaduro de trepadou. Pèr basti lou bàrri s'apielavon sus lou roucas e, de cop, falié cava founs pèr trouva la roco soulido counvenènto.

Dins la nauto vilo, li mèmis oustaloun carra arrengueira long dis andano estrecho que se coupavon à angle vièu.

L'oppidum èro ócupa de countùni, s'es meme trouva de marco de ço que manjavon li gènt, subretout de couquiho de muscle. De mai avèn aqui uno di molo pèr escracha lis óulivo e reculi l'òli. Un sourgènt èro proche, pamens un

pous fuguè cava founs de 25 metre, pèr servi, se penso, dins li cas de mau-parado.

L'ouro de la cabussado es mau couneigudo ; pamens l'estùdi dóu site mostro plus ges d'ócupacioun après la fin dóu siècle segound. Acò s'endevèn, semblarié, emé lou chaple dóu castellaras de Entremount, capitalo saliano, e de Roco-Pertuso santuari di sàli tambèn. ; guerro menado pèr li rouman .

S'es trouva de boulet de calibre sus la cièutadello e de pouncho de matrasino qu'èron facho dins l'estiganço d'èstre atubado avans d'èstre largado pèr pourta fiò encò dis ennemi. Aquélis armo soun tóuti roumano e semblarié que lou sèti fuguè mena enjusqu'à la fin finalo

LA CIVILISACIOUN DOU MOUNT BEGO

Lou mount Bego s'aubouro de mai de 2800 metre dins lou massis dóu Mercantour, dins un païsage de bèuta soulenco e de silènci... ;

De lau ié fan mirau... lou lau verd... lou lau negre... lou basto...

De valado l'encençon qu'an pèr noum la Vau-Masco... La valèio di Meraviho...

Lou mount recato un mistèri que fai chifra li cercaire dempièi de tèms e de tèms...

D'ùni marco d'uno civilisacioun descouneigudo s'estalouiron dins la mountagno, esparpaiado sus li roucas que li darrié counglas an lissa.

« *<Aqui nasquèron de diéu que soun noum se dis dins ges de lengo, que vivon sus aquelo auturo amoundaut enviroina d'uiou... Alan Fournier)*

L'imaginàri populàri aguè lèu fa de ié vèire la demoro dóu Diable. E li noum d'endré , lau o cimèu, soun lou rebat d'aquel esfrei : la Vau-Masco... La Maledià... lou lau dóu Trem... La cimo dóu Diable...

Aqui soun esta descubert sus de lauso lissado de signe misterious grava dins la roco.

Aquéli marco soun facho poun pèr poun em'uno pouncho e mostron d'un biais assemblé , pamens parlant, la vido d'un pople de pacan e de pastre.

Li signe banaru soun li mai nombrous ; representon belèu de troupèu de vaco o de cabro o... li bano dóu Diable éu-meme ! Se vèi tambèn de meno d'outis, d'arair, de coutèu, de pougard,, de càrri... e de dessin geometri. Se penso, sènso rèn afourti, qu'aquelo civilisacioun sarié estado à soun pountificat dins

l'age dóu brounze, valènt à dire 2000 an davans Jèsu ; e s'amoussè dins la pountannado pre-roumano.

Li signe grava soun en abounde, belèu 100.000 ! Pamens s'es ges trouva de marco d'un abitage, meme souto lis avançado de roucas, meme pèr uno pas-sado. Un soulet abri souto roco fuguè descubert emé quàuquis óutis pre-istouri. Quàuqui cassaire prouvable o d'ùni gravaire venènt coumpli soun pres-fa... o d'ùni pastre roumièu vengu faire oumenage au Diéu Bego, an pouscu se i'assousta.

Acò tèn, segur, au climat forço rude, la nèu enmantello roco e draio la majo part de l'annado. Antan se countavo voulountié tant d'istòri à prepaus d'aquéli signe misterious, qu'un italian se gandiguè amount e s'entournè es-trambourda.

Fauguè pamens espera la debuto de noste siècle pèr que coumençon (dóumaci aqueste cop un anglés !) lis estùdi toucant li gravaduro. Uno lauso que pourtavo un signe mai parlant, lou chefe de tribu, fuguè recatado dins lou museon de Tendo.

LI BAUMO DE CALES

*E lande dins Calés, l'antico cièuta morto
Qu'escound tant de secret embarra dins si porto ;
Calés que li Ligour , nòsti vièi davancié
Ié cavèron, antan, sis oustau roucassié....
Reinié Savoye (au murmur demi pin)*

Ansin canto lou pouèto manounen, dins aquéu païsage, dins aqueli coumbo sarrado entre dous baus cava de baumo noumbrouso...E dins lou silènci siau de la colo, que soulet lou murmur di pin car au cor de Reinié Savoye vèn de cop treboula... avèn bèn idèio d'uno ourigino forço aliuenchado, perqué pas pre-istourico ?

E vaqui que de sabènt nous vènon dire : Nàni !

Quàuqui beloio soun bèn estado trovado ... mai pas forço, pas proun pèr afourti uno ourigino que, fin finalo, sarié pas tant aliuenchado. D'aquéli descuberto , pèr li mai anciano, se parlo dóu siècle cinquen davans l'èro nostro, pas mai avans.

Estènt que soun de manco li tros de terraio que se trobon à l'acoustumado e que lis óujet destousca soun gaire en noumbre, li cercaire jujèron que lou rode fuguè abita soulamen pèr passado.

Pèr la memo resoun dóu manco de terraio, recuson l'idèio d'unop ócupacioun duradisso di Ligour.

Pamens semblarié que sian aqui davans un oppidum, mai parié pèr li rouman, maugrat d'ùni mounedo esparpaiado , parèis qu'an jamai planta caviho dins lou rode.

Ço qu'es de segur es que, aquéli baumo soun pas naturalo ; d'ome lis an cavado ; se pòu vèire dins la roco ribassudo li trauf fa pèr li pau que pourtavon lis envans.

La resoun d 'aquéli baumo que li cercaire penson la mai resounablo, la mai ver-tadiero, es que sarien estado cavado pèr li servo dóu castèu que fuguè basti dins l'age mejan.

Adounc,vous fau segui li sabènt dins si quisto scientifico.... O countunia de pantaia emé lou pouèto...

Pèr vous gandi dins « l'antico cièuta morto» que la pensés ligouro... roumano o de l'age mejan ! avès la chausido demié dous camin.
-Un que, passant darrié la glèiso dóu vilage de Lamanoun, vous menara vers l'intrado dóu coustat dóu pounènt.

- L'autre que, pèr uno draio un pau plus longo belèu mai talamen bello, vous menara, elo, vers l'intrado levanteso.

....Caminarés demié li pin qu'amavo tant lou pouèto ; au passage farés de tout segur pausetto un moumen fin de remira la tant poulido capello qu'es dedicado à sant Dànis bastido dins l'estile rouman prouvençau.

...Regretarés que siegue barrado

.....e pièi pensarés que s'ameritarié que s'en ócupèsson un pau mai .. es tant bello...

E pièi toujours mountant arrivarés pèr lou camin que s'acabo en escalié. Davans la porto duberto dins uno muraio espesso que marco l'intrado de la cièuta, la porto levanteso.

Dins li dous coustat de la coumbo de baumo soun cavado dins la roco lisso ; au mitan, un roucas particulié mounte s'atrovon dins l'embaso quatre baumo que soun subre-mountado d'uno salo, dirias, mai à cèu dubert, uno salo emé dos renguiero de banqueto que courron long di paret de pèiro apareiado

Aqui poudien intra de tres porto. Acò sarié, poussible, uno meno de salo de receicioun ; d'ùni avançon l'idèio d'un poussible tribunau o d'uno capello rustico !

Pèr un draïou rede se pòu mounta enjusqu'au liò mounte, un tèms, avien auboura un castèu e que i'an pièi ... auboura uno estatuo e la Vierge ;

Lou castèu es aro coumpletamen arrouina ; s'atrouvavo bèn situa pèr teni d'àment lou soulet passage entre Aupiho e Trevaresso vers la Crau. La visto s'espandis liuen sus touto l'encountrado.

Lou castrum d'Amalicum es signala au siècle cinquen. Si segnour pourtèron de siecle de tèms lou noum d'Alamanoun.

Aquéu noum parèis pèr lou proumié cop en 1146 quouro Aubert d'Alamanoun venguè presta juramen davans Ramoun Berenger II, comte de Prouvènço. D'aqui vendrié lou noum dóu poulit vilage prouvençau que couneissèn.

Lou castèu fuguè d'à cha pau abandouna e lou site cabussè dins l'óublit..

GORDO E LOU VILAGE DI BORI

Lou vilage de Gordo s'aubouro sus lou roucas que doumino la valèio dóu Calavoun. Lis oustau an escarlimpa lou pendis enjusquo la cimo que lou castèu la courouno.

Se barrulas pèr lou vilage, à l'asard de vosto proumenado descurbirés de carreiron estré... uno anciano encencho de defenso... uno carriero en escalié... uno porto fourtificado, la porto de Savoio, que demoro aqui dempièi l'epoco dis anciàn fourtificacioun, aperaqui lou siècle vounge, soubro d'un tèms que fasié mestié de s'apara contro touto meno de maufatan e d'envahissèire.

Gordo es di mai bèu demié tóuti li vilage ansin quiha sus soun roucas emé sis oustau que se sarron proche lou castèu dins l'estiganço, segur, de veni lèu se i'assousta se besoun n'èro.

Aquéli envahissèire, dins lou debana di siècle, Gordo parié coume touto la Prouvènço lis a couneigu. Lis envasioun soun l'encauso, l'ourigino di vilage siegue basti sus l'auturo,, siegue cencha de bàrri pèr aquéli que s'atrouvavon dins la plano.

Lou viè castèu fourtaresso basti tre lou sisècle vounge, venguè moudifica dins li siècle tregen e quatorgen . De l'epoco primitivo noun soubro que li dos toure dóu castèu e, dins lou bàrri, la porto de Savoio.

Lou bèu castèu reneissènço dato dóu siècle segen. Dóu tèms di guerro de religioun e au moumen dóu massacre di vaudés, tenguè targo en tóuti lis envahissèire.

L'encountrado fuguè abitado tre l'epoco paleoulitico ; s'es trouva de marco enjusquo 8000 an arrié. Pamens es subretout dins l'epoco neoulitico que li marco soun en aboude, provo que lou terraire vèn de mai en mai poupla. En aquelo

tempouro coume d'en pertout, lou tèms di grand cassaire es abena ; decessant d'èstre barrulaire, li pople vènon pastre o païsan.

Sabon se basti d'oustau fa de pèiro (aqui li pèiro soun pas de manco !) e de tàpi. Aquélis oustau à la debuto èron pas mai que de cabano que se n'en pòu vèire de soubro aclapado sus d'ùni planestèu de Leberoun. Eron pamens li premìci di bòri que vendran coustrucho plus tard.

Lou gros prougrés d'aquelo epoco fuguè de saupre pasta l'argiello e d'adouba de terraio. Demié la moulounado de terraio routo an dessousterre de tros de gerlo adournado en cièucle emé l'ajudo d'un couquihage particulié lou « cardium ». Aquelo decouracioun dicho cardialo se rescontro , i tèms neouliti, dins tóuti li païs ribeirés de la Mieterragno siegue en Prouvènço, siegue en Itàli, siegue tambèn dins d'isclo de la Mieterragno. Provo de rescontre emé d'àutri pople que sabien se faire de batèu, proubable en cavant li pege d'aubre grandaras. Au countràri, aquelo civilisacioun sèmblo bèn que depasso pas 75 kiloumetre en dedins

Di*terro.

Adounc s'agis d'uno civilisacioun de la mar.

Demié lis óutis fa de peirard an trouva de lamo proun grandò que serviguèron de voulame, de pouncho de matrassino, tambèn de destrau e destraletò de pèiro lissado.

Lis entresigne defauton pèr la tempouro proto-istourico, mai n'en trouvan en abounde toucant l'epoco roumano : de sepóuturo, de tros de gràndi gerlo, li « dolia », pèr serva lou gran, l'òli, lou vin ; de mounedo tambèn e de terme impourtant ; daumage que lou site di terme es esta rendu pèr tournamai èstre fatura après que i'aguèsson leva ço qu'èro poussible, de mounedo e àutris óujet interessant.

LI BORI

En Prouvènço uno bòri es un casau, uno cabano simplo, bastido à pèiro seco ; Aquéu biaï de coustruire se retrobo dins d'àutri regioun proche : la Gardou-nenco, li Ceveno, tambèn dins d'àutri païs ounte lis estajan an pouscu trouva en abounde sus soun terraire li lauso counvenèto. Pèr ço qu'es bèn segur que li gènt bastissien emé ço qu'avien à la pousito , de cabano de sagno dins li rode palunous , à pèiro seco dins li claparedo.

L'ouriginalita de Gordo es que li bòri ié soun en noubre e que l'ensemble se presento coume un vertadié vilage ourganisa.

Aquéli bòri, de mounte vènon ?

D'ùni avien pensa qu'èron de soubro de la proto-istòri, dóu tèms di Galés.

S'averè pièi qu'acò èro pas vrai. Li bòri que vesèn aro soun estado bastido ape-raqui lou isècle segen. Pamens l'architeituro retrais poun pèr poun lou biais cou-neigu qu'aguèron li ligour. Aquéli pople se saup que trevèron lou rode e touto l'encountrado dóu païs de Gordo.

Adounc se pòu pensa que li bòri soun estado aubourado, belèu à quaucarèn pro-che, de la façoun en usanço dempièi de milenàri.

Uno bori, coume es bastido ?

Li bòri soun aubourado sènso fundamento sus un sòu remes de nivèu simpla-men, s'acò èro de besoun.

Dous biais de mounta li mur :

- Li lauso soun pausado à plat, uno despassant l'autro, uno idèio en pendo fin que s'escampon lis aigo de pluèio. Tre la proumiero renguiero e à flour e me-suro que li mur se faran aut, se vènon barra vers la cimo enjusquo lou mou-men qu'uno souleto lauso, proun grand, sufira pèr barra touto la téulisso.
- Segound biais :
- Li mur soun mounta dre enjusquo l'aussado souvetado piei parton en avan-çado coume avèn vist deja, pèr se jougne à la cimo.
- Li mur soun espés ; li lauso avien d'être chausido de mai en mai larjo fin d'assegura dóu mies l'equiibre.
- Li bòri pèr lou bestiàri an serva lou sòu coume èro de naturo.
- Li bòri pèr abita an souvènt uno chaminèio. Virado vers lou miejour, si fenè-stro emai si porto soun estrecho. Quàuqui fes uno paret desseparo en dous membre lou dedins de la bòri. Dins quàuquis uno s'atrobo meme uno escalo pèr ajougne , dirias, un estànci que poudié servi de chambroun.
- Dins l'espes de la muraio an cava de meno d'estagiero. Se ié trovo perèu uno pèiro cavado pèr faire un eiguié ; ansin poudien faire regoula lis aigo. L'en dedins du mur es passa à la caus.
- Uno bòri mesuro aperaqui 10 metre de long, li mur soun espés de 1 metre à 1 metre e mié. La larjour en dedins es de 2 metre 50. Li mur vènon mai espés à flour e mesuro que vènon mai aut.

LOU VILAGE DE BORI

De Gordo pèr arriba au vilage de bòri, la draio serpetejo entre dos muraio mountado à pèiro seco. Sus lou aut de la mureto, liogo d'être pausado à plat, li lauso soun messo de cantèu. Se pòu dire que lou site se partejo en cinq centre de vido, cadun emé si bòri pèr abita e aquéli pèr lou necite de la vido : estable ; jas-so, feniero, tóuti enclauso de mureto.

Dous four sufisien pèr faire manja tout lou vilage ; parieramen coumuno en tóuti lis estajan ,s'atrobon dos suèio, dos magnanarié, uno jasso pèr la cabruno.

L'ièro centralo servié pèr lis obro facho ensèn, eisemple li cauco.
Tenènt à l'iero un enclaus pichot ounte embarravon li fedo, mai pas de longo, à l'oucasoun belèu de la tounto.

LOU MAS DE REY

Lou doumaine dóu mas de Rey, à la pouncho nord de la Camargo, es la resulto dóu desmembramen de l'ancian mas de Boschon. Ero, à passa-tèms d'uno estendudo tras que vasto. Tau coume se pòu vèire à l'ouro d'aro, n'en demoro paments demié tóuti li mas camarguen, un d'aquéli que, dóu mies, n'an serva li caractere d'ourigino.

Tre lou siècle segen, li proupietàri plen de voio e bèn à soun afaire, l'avien coustitui dins l'estiganço de reuni aqui li coundicioun li mai requisto, pèr l'epoco, d'un tenamen de bono tengudo.

Coustejant li levado que, dempièi de siècle, restancavon lou cours vanegaire dóu Rose, lou mas èro prouvesi en bono aigo ; dóumaci uno presso d'aigo que sis assiso s'apeounavon, puissant, facho de bèlli pèiro apareiado.

Cavèron un sistemo bèn estigança de trencado doublo, pèr faire fàci en un besoun double : un canau adusèire pèr l'aseigage, e uno roubino pèr embandi lis aigo palunenco fin d'assani li terro.

Au mas de Boschon, li semena de cerealo ócupavon la majo part di terro labou radisso, acantounado à l'uba dóu tenamen, dins lis àuti terro. Entandoumens que dins li bàssi terro, pasturavon li troupèu, majamen lou fedan, esperant l'amountagnage.

A rode venié un gaire de vigno ; d'efet, en aquelo epoco, soulet gran e bestiàri fasien vièure la regioun.

Pamens se tardarié gaire de faire de magnan dins l'encountrado e , benlèu, de renguiero d'amourié venguèron tremuda lou païsage.

La bastisso fasié un reitangle dubert sus lou quatren coustat, vers lou miejour. Aqui dintre se venié renja tout lou necite à la vido vidanto d'un mas prouvençau bèn coumprés.

Souto sa téulisso basso se tenié, rabasseto, la demoro dóu pelot ; semblavo que voulié, dóu mies, s'arrapa à-n-aquelo terro que lou mèstre, de soun travail, la devié endrudi ;

De cade coustat s'arrangeiravon, large e founs, lis estable pèr li chivau, li jasso emé lis apoundoun enmancable : ataié simplas pèrfin de radouba à la grosso lis estrumen agricole... envans pèr ié metre à la sousto lis óutis... lou poucièu... lou galinié... lou celié... lou four... que la tanto ié pastavo cado semana un pan goustous fa 'mé la bello flour de farino dóu teraire que lou pelot pièi partejavo sènso coumta en touto l'oustalado assetado à lentour de la taulo peirenalo.

Lou pijounié, meno de tourrihoun feoudau trenca, segnourejava sus l'ensemble de la bastisso.

Semblavo uno toure carrado un pau frusto mai que l'armounio de si formo rendié gracioso.

Li pijoun se i'entraucavon pèr de duberturo minçourleto taiado en augivo.

Pamens ço que lou mai tiravo l'iue èro la capello. Aqui istavon l'amo emai lou cor d'aquelo bastisso tant bèn estigançado.

Au mitan de l'alo de drecho, sa galanto faciado se remarcavo.

De capelan barrulaire èron carga dis obro de glèiso dins li grand mas e, de dimenche que i'a, ié venien dire messo. Mèstre e serviciau ié pregavon ensèn coume antan se sabié prega.

Cadun invocavo lou Diéu que, à soun agrat, despartis li dardaiado dóu soulèu e la frescour dis eigagno.

Cadun ié venié demanda que faguèsse greia e s'amadura li meissoun que l'ome pièi bagnarié de sa susour...

Gaire de causo an subre-viscu d'aquelo capello mounte de generacioun e de generacioun de l'antico raço di Boschon ié preguèron d'à geinoun.

Lou benechié de pèiro porto encaro, escrincela, lou blasoun de l'autiero famiho : tres velo desplegado. L'ourguiouso deviso disié :

A mai de velo, mai de fourtuno !

L'audàci fisançouso de la famiho di de Boschon fuguè recoumpensado que, long-tèms, la fourtuno invocado ié sourriguè.

Catalougno avié vist la neissènço e l'expandimen de la famiho di de Boschon, Prouvènço fuguè pièi pèr éli terro abelano.

Mai ai-las ! lou jour venguè que li counfrount de Prouvènço e de Catalougno sèmlèron trop estrechoun à soun ambicioun creissènto, sènso termino ; e la fourtuno, aqueste cop ennemico de l'antico lignado, butè li de Boschon à Versailles.

De siècle de tèms ; li rai arderous dóu soulèu de Prouvènço e de Catalougno avié fa trachi e prouspera la meisoun ; li rai mai cremant belèu dóu Rèi Soulèu ié fuguèron fatau.

L'antico raço s'afoundrè arrouinado.

En 1668, li bèn de aut e puissant segneur de de Boschon, ajudant de camp, Ouficié i gendarme escoussés de la Meisoun dóu Rèi, esquihèron entre de man routuriero segur, pamens forço mai sàvi.

Lou mas di de Boschon èro desmembra. La majo part di bèn fuguè aqoustado pèr un riche marchand d'Arle, lou bourgés Rey.

De vendo en vendo, lou doumaine venguè fin finalo proupieta dóu marqués d'Alauzier en 1843.

Desempièi lou mas de Rey a trouva soun trelus d'antan. La vièio capello fuguè radoubado emé proun goust e d'àutri relicle d'un glourious passat arlaten soun vengu s'ajougne i vièi souveni di de Boschon. Vai ansin que la porto clavelado di pouncho diamentado es aquelo que de siècle

de tèms s'es duberto à brand, sèmpre aculissènto, au lindau de l'illustro famiho di Porcelet.

La nicho de pèiro qu'adorno la faciado es elo tambèn que recatavo la madono assoustarello d'aquelo Meisoun.

« Salut Maire de la Bono Fourtuno » disié deja (en latin !) l'invouacioun gravado i pèd de la Vierge que benesis, coume lou dis encaro vuei sus la faciado de la capello di Rey.

De pampo de vigno s'enviroutavon à l'entour de la coulouneto à mita sertido dins la pèiro. Lou cintre redounèu qu'aparo la madono es, dins sa courbo poullido d'uno graciouso resulto.

A l'endedins de la capello li flourdalis d'or e la crous de « gueules » de Loureno signado Ripert d'Alauzier, vesinon aro emé li tres velo desplegado di de Boschon.

Faudrié aro agué uno pensado pèr aquéli gènt que, pèr soun estrambord e sa voio, an sachu counquista sa terro maugrat lis imour capriciouse dóu Rose.

Dins aquelo lucho lieurado pèr l'ome à la naturo, la part dóu passat es de liuen la mai impourtanto.

Li pajo que venèn de legi soun estado levado dis archièu de la famiho Ripert d'Alauzier emé sa permesso, e revirado au prouvençau dins lou cours de nivèu tresen à la Clapouito.

Li proupietàri de vuei, la famiho Mazzolini, an sachu, éli tambèn, se moudernisa e asata lou trin dóu mas à la vido atualo.

Lou vignarés es couneigu dins l'encountrado, e dins lou sourne de la croto s'amaduro un vin de capitàni.

LOU MAS DI TOURRELLO

Emai s'atrobo basti en terro lengadouciano, proche Bèu-Caire, lou mas di Tourrello pamens douno bèn d'èr à un mas prouvençau , pulèu dins lou biais camarguen.

Es un mas dóu siècle des e seten., mita camin entre Bello-Gàrdi e Bèu-Caire, valènt à dire dins lou vignarés emé, tèms en tèms, d'óulivié e d'auciprés que se destacon sus l'estendudo di vigno.

Parié coume l'avèn vist deja au mas de Rey, se presento coume uno meno de U grandaras, un reitangle dubert dóu coustat dóu miejour.

L'oustau dóu masié oucupavo , come ei de tradicioun, la faciado souleiouso au founs dóu reitangle que douno sus la grand court.

Davans la porto lou banc de pèiro tradiciounau counvido à se pausa, chourlant la souleiado .

Dins lou cantoun de la bastisso, lou pijounié que la glicino giganto escarlimpo gaiardamen..

Lou mas es tras que bèn entretengu ; li proupietàri de vuei an achu lou remetre de nõu sènso pèr acò ié leva ço que n'en fai la bèuta... aqui veirés un saumié que laisso devina soun age... eila la grand chaminèio que tèn touto la parret... de malounage ancian...

Dins la court soubro encaro uno partido de la pouso-raco que lou miolo viravo... viravo...antan.

Se pòu vèire l'aubre-dré... l'aubre jasènt... mancon li goudet poussaire e la traio.

Cavant un jour dins lou campèstre, un jour astra, dessousterèron de tros de pèiro ligado que s'averè pièi qu'èron li fundamento d'uno « villae » galoroumano dóu siècle proumié vo segound.

De recerco scientifico fuguèron menado e d'estùdi serious dounèron qu'aquelo demoro èro rèn mai qu'un ataié de fabricacioun de gerlo, mai de gerlo d'uno formo especialo, de gerlo dóu founs plat.

S'avisèron lèu, d'aquéu tèms, qu'èro uno modo forço coumodo pèr carreja l'òli, lou vin en mai dóu gran. La gerlo fuguè vite couneigudo e tardè pas de faire flòri, bèn talamen que de tros n'en fuguèron descubert enjusqu'en Souisso e en Alemagno.

Aqui se fau ramenta que lou mas es basti proche Bèu-aire, valènt à dire proche lou Rose que de toustèms fuguè un liame de coummunicacioun , proche tambèn de la Via Doumitia , l'antico draio roumano.

Adounc coumèrci se poudié faire emé li pais de l'uba, tambèn emé Rioumo.

Li gerlo èron pas grando parieramen mai de mesuro diferento, fissado pèr avanço.

Li gerlo pèr lou vin èron enviscado en dedins emé de peresino, que lou vin aurié poussu à la longo s'enfusa au través de l'argielo.

La descuberto di rouino e l'acuiènci que é faguè lou C.N.R.S. dounèron de vanc à l'estrambord di proupietàri. Emé l'ajudo de scientifi se groupèron à n-estudia l'istòri dóu vin dóu tèms di rouman e di galés. E tambèn lou biais de la vinarié .Emé passioun cerquèron e legiguèron li tèste ancian majamen Coulumelle, escrivan dóu siècle proumié, qu'escriguè de trata d'agrounoumìo, tambèn Caton e Pline que, dins sis escri en latin ié pesquèron d'entresigne precious toucant la fabricacioun dóu vin.

Après lou tèms dis estùdi, venguè lou moumen de metre en obro tout ço qu'avien après. Fuguè la realisacioun d'un pantai. Faire vièure tournamai li vin

desóubliada. E acò tambèn es un mejan de saupre la vido d 'à passa tèms, un pas-sat liuenchen. E s'avisan que li goust de nòsti rèire an pas grand causo de vèire emé li nostre !

Dins la tino,éli avien de gerlo, ounte reboulis lou jus de rasin, apoundien d'aromat... un coudoun ...de safran... que dounavo de bèlli coulour... E un parfum especiau, de « grano de boudin » (en francés coriandre),de mèu.. de roumanin.. e meme d'aigo de mar ! mai li goust à l'ouro d'aro an chanja e la resulto d'aquéu darrié assaja fuguè pas di meiouro ! lou poudèn pas empassa. Lis autre soun tras que goustous ;

Au mas se pòu tasta lou mulsum, lou vin arqueoulougi, fa poun pèr poun coume lou fasien li rouman, mescladis de jus de rasin rebouli , de mèu, e d'espèci.

Lou « defrutum » es adouba emé de jus e rasin que soun bouta couire sènso agué rebouli e que i'apoundon de mèu.

Dins uno alo dóu mas, an recoustitui uno croto vinassiero talo coume èro dins lou tèms di rouman . Parié come à l'epoco de Couloumelle lou rasin coupa emé la poudadouiro es cauciga avans que de passa au destré. Lou destré es fa coume se pòu vèire recoustitui , d'un pege loungaru que fai bèn si 10 metre, mantengu d'un coustat entre dous pau dré e, de l'autre las, mougu au mejan d'un palanc que mountavo lou bras fin de lou plaça souto lis escourtin emé lou rasin cauciga. Pièi, fasien veni lou pau sus lis escourtin que lis escrachavo de tout soun pés. Lou jus èro reculi dins uno meno de bacin.Pousa em'un ferrat de bos, anavo pièi rempli li Dolia que soun de gerlo dóu founs pounchu, grandarasso e que ié caupon dedins 1000 litre de vin.

LOU MAS DE RAILLON

Diren d'intrado que l'ourtoigràfi dóu noum fuguè pulèu chanjadisso au debana di siècle.

Dins lou Grand Tresor dóu felibrige, Mistral noutè : Raioun, noum de famiho prouvençau.

Is archièu de la vilo d'Arle, dins li recerco de l'abat Veran , se pòu legi un raport en dato dóu 12 d'Outobre de 1635 à prepaus di superficìo abladado. S'atrobo aqui touto uno tiero de noum di mas coucerni e, demié éli, lou noum dóu mas de Rayon que s'escrivié em'un Y.

Es aro vengu Raillon, mai se saup pas desempièi quouro l'ourtoigràfi a ansin chanja.

De remarco en Arle, s'atrobo, dins lou quartié de la Rouqueto, qu'es lou mai ancian de la vilo, uno carriero que soun noum es Raillon, « carriero de l'abat Raillon ».

Se saup que, à passa-tèms, èro de coustumo de bateja lou mas dóu noum d'aquéu que l'avié fa basti. Adounc es de supausa que la famiho Raillon n'en fuguè la proumiero proupietàri.

Remountant à rèire dins la genealogiò de la famiho, avèn couneissènço tre 1404 de la famiho de Courtois à Sant Martin de la Crau e Langlade.

Aquéli noum, lis anan trouva enca'n cop dins lis estùdi de l'abat Veran. Dins soun arredamen de 1469, lou noutàri Pangonis fai mencioun à la pajo 273 de soun proutoucole que, demié li terro enermassido, lou Chapitre remet à Noble Estève de Langlade, un moulin de vènt, emé oubligacioun de moudre blad.

Damisello de Courtois, se maridè pièi emé Moussu de Cheneville, aguèron uno fiho,. Damisello de Cheneville venguè pièi Madamo de Velle. Es encaro lou noum que porton li atuau proupietàri dóu mas.

Es pas souvènt que se pòu vèire un mas de talo impourtànci que demourè dins la memo famiho dempièi soun ourigino.

La famiho de Courtois fuguè, de pèr sis alianço, d'un grand drudige, veguènt s'ajougne à si bèn de mas, de terro en Prouvènço emai en Lengadò ;, d'oustalas en Arle .. un d'aquéli fuguè croumpa pèr l'ajougne à la bastisso de la souto-prefeituro d'Arle.

Lou mas se presento basti dóu biais seculari di mas prouvençau, valènt à dire que s'estiro dóu levant au pounènt ; la faciado principalo duberto au miejour, s'adorno d'un cadrant soulàri e d'uno campano que devié dinda siegue pèr apela lou mounde pèr s'entaula, siegue quouro se disié messo dins la capello. La capello s'atrobo dins l'enfielado di peço d'abitacioun e fai cors emé la bastisso. La campano s'amerito que la regarden de procho : porto uno iscricioun en prouvençau :

*Enaure la vido
Ploure li trepas
Is amo ravidò escampo la pas.*

Lou pijounié s'aubouro, forço poulit emai siegue pas de l'epoco de la bastisso ; pamens, tre soun ourigino estènt la noblesso de si proupietàri, aurièn agu lou dré de faire ajougne lou pijounié.

Lou mas, l'avèn di, es forço ancian, poussible que i'aguèsse agu , un tèms,un pijounié e que à la longo di siècle se siguèsse aclapa.

Coume que vague, lou pijounié atuau es bèu e li pijoun dessinon si zistoun-zest agradiéu pèr dessus li téulisso.

Emai siguèsse esta amputa d'uno partido de si terro pèr traça la routo de grandò circulacioun e la courregudo de santa, lou tenamen es encaro grand d'uno centeno d'eitaro ; li pradarié à l'arroustage verdejon tant que ; de terro soun reservado pèr li semena, se vèi perèu uno plantado d'amelié jouine.

Lou mas es basti au bout d'uno lèio de plantano grandarasso que jamai counei-guèron lou resset e an trachi ansin, souleto, libro e superbo.

Semoundon d'estiéu uno ombro requisto coume fan tambèn li marrounié gigant. Dins lou pargue proche l'oustau-mèstre, uno crous es tancado. Es d'asard que fuguè descuberto, venguè dessousterado, un jour, en charruant. Es escrincelado di dous coustat e porto grava d'un coustat la Vierge e de l'autre lou Christ.

LA SAMATANO

Au bord de la naciounalo 113, que, de Seloun tiro vers Sant Martin de la Crau, uno bastisso mai qu'à mita arrouinado, es la Samatano, ancian relais de diligènci.

L'obro de sauvo-gàrdi es aro en trin mai talo coume es à l'ouro d'aro, li téulisso crebado e lo paret leprouso, an acò d'interessant que leisson vèire tóuti li detai de la coutrucioun : saumié... téule... tout de téule rouman, pèiro d'angle..

De remarco, l'oustau qu'èro abita s'atrouvavo au mitan de la bastisso e lis estable de cade coustat.

Venènt de Seloun, li diligènci s'arrestavon pèr chanja li chivau, li bèsti alassado venènt dins l'estable à man drecho. ; esperavon aqui lou moumen de s'adraia tournamai vers Seloun.

A la diligènci èro pièi atalado de bèsti qu'èron à l'espero dins l'estable de gaucho. ; éli prenien lou camin d'Arle.

La restauracioun a coumença pèr ço que lou mai èro de preisso, valènt à dire li téulisso metènt ansin à la sousto li saumié.

L'obro de restauracioun se perseguis e un parèu de gàrdi soun à demoro pèr viha.

LOU MAS DE L'ESTANG

Lou mas, antan, s'apelavo mas Dezzaune, dóu noum de soun proupietàri. A la longo dóu tèms, aquéu noum venguè tremuda en « mas des aulnes » emai que de verne lou rode n'en siguèsse toujours esta sènso !

Lou tenamen a uno estendudo de 300 eitaro e l'estang à-n-éu soulet n'óucupo 100, que soun un paradis pèr uno troupelado de canard e quàuqui pescaire.

Lou mas fuguè basti aperi aquí lou siècle quingen. Abandouna de tèms e de tèms, à la piho de maufaras e destrüssi de touto meno, à mita arrouina, servié plus de

rèn en res, aleva de cop pèr ié faire un filme coume n'en fai provo l'iscricioun en rùssi sus lou lintau d'uno salo.

Venguè pièi lou moumen que de soucieta fourestiero cujèron de lou croumpa pèr ié basti siegue un vilage grandaras, siegue un centre de lesi.

Sabèn tóuti l'interest que presento l'estang pèr lis eco-sistemo de Crau e que demoro forço precious pèr l'auceliho e la Naturo en generau.

Fin finalo, à la demando dóu municipe de Sant Martin de la Crau, lou tenamen fuguè croumpa e venguè proupieta dóu counsèu generau.

Lou mas adounc reprenguè vido, mai es bèn segur qu'aquelo vido de vuei es forço aliuenchado de la vido qu'èro siéuno à l'ourigino.

Li téulisso que ié mancavon forço téule.... Li paret que toumbavon en douliho... tout acò fuguè radouba emé lou respet degu i vièii pèiro e dins l'esperit d'antan.

Lou crepi demoro rusti e la pèiro de cambage talo qu'èro fai quàuqui siècle..La vinassiero a serva sis arcaduro ; es uno salo grando baumeludo ; se ié fai plus lou vin ; dins la nouvello ourganisacioun, touto uno partido de la vinassiero anciano es previsto pèr istala de sanitàri pèr li chambro que soun en trin d'adouba e que saran ócupado pèr d'artiste de passage.

Lou vièi pous de pèiro blanco es adoursa i grandas escalié que mounton vers la grand salo.

Lou pous es belèu mai ancian que la bastisso elo-meme.

Servié subretout pèr l'abèurage di troupèu. L'oustau-mèstre èro prouvesi en aigo pèr uno antico e ingeniouso mecanico aussant l'aigo, que sourgentavo à l'arrié dóu galinié, enjusqu'is estànci.

Aquel oustau èro la residènci, se pòu dire, segoundàri di pelot que restavon siegue en Arle , siegue à -z-Ais o à Ma rsiho. Pamens ,de cop, fugissènt la calabreno de la vilo, venien aqui passa l'estiéu, un pau mai à la fresco en ribo de l'estang.

En bas, la cousino, la souiardo e lou pichot saloun an serva soun bèu malounage d'ourigino, gaubeja à la man.

A l'estànci de burèu e de salo de reunioun ;soun aro renjado à la mouderno mai li bèlli pèiro demoron sèmpre aparento e li porto soun bèn d'epoco.

Es bèn verai que la vido a chanja, se ié fai plus lou vin, e lis estable soun vuege.

A l'ouro d'aro lou mas a voucacioun de se tremuda en centre culturau, subretout pèr la musico.

Li councert que ié soun douna d'estiéu an davera deja grosso renoumado lis amateur ié vènon à vòu.

Mai pèr n'arriva en aquelo resulto, l'obro fuguè grando e demandè tenesoun.

L'ière fuguè assiéunado, li baragnasso an leissa plaço en d'aubre e aubrihoun requist. La tribuno di sèti levadis aculis milo cinq cènt persouno e dóu tèms que fasian nosto vesito nous fuguè assegura que, cade cop, tóuti li sèti soun ócupa. Sus lou pountin es un centenau de musician que podon prendre plaço.

La grand salo tout en aut di grands escalié s'alestis pèr deveni salo de rescontre Deja l'estiéu un vintenau d'estudiant vènon aqui pèr ié travaia. Dins lis annado avenidouiro lou mas de l'Estang sara en mesuro d'aculi uno quaranteno d'estudiant o d'artiste que ié vendran pèr travaia.

La longo jasso es à mand d'èstre adoubado dins l'estiganço de veni salo d'espousicioun. Quàuqui membre de l'oustau an deja servi pèr ié faire de mostro mai soun trop estrechouno pèr aculi d'espousicioun impourtanto. Lou mas de l'Estang es dounc à mand de veni lou pole de la culturo e subretout de la culturo musicalo mai perèu de pinturo, de nosto regioun.

JOUIOUSO GARDI

Basti de long la routo que vai de Sant Martin à Mouriés, just au toumbant de la valado di Baus à la toco-toco emé li font de Mouriés, vesino vers l'uba emé lou cresten dóu doumaine de Santo Fe (Sainte Foy en francés) que fuguè martirizado en 287 : si relicle soun ounoura à Counques dins Aveiroun.

En 1225, Jouiouso Gàrdi èro pas mai qu'uno partido de l'immense tenamen de la Grand Vaquiero que venguè pièi despartejado demié li coumuno de Mouriés e de Sant Martin. Lou partage seguissié li limito naturalo mai, coume souvènti fes arrivo, degun estènt vengu vèire de proche lou terraire, se fisèron soulamen i plan, d'un biais tau que l'estajan que demouravo dins sa bastido sant martinenco, entre passa la porto que se durbié au levant de sa demoro s'atrouvavo... à Mouriés !

Acò's rèn que li galejado di plan cadastrau ! e fin finalo fuguè poussible au proupietari de croumpa un tros de terro e de l'apoundre à soun bèn en lou restacant à sant Martin.

L'oustau mèstre douno sus uno court barrado que sis àuti muraio l'aparon dóu deforo e di rounflado dóu mistrau.

Li fenèstro soun à mountant. Au founs de la court, lou pous, necite à la vido de l'oustalado. Dous cadrant soulàri, un au levant l'autre au miejour.

Franquissènt la porto dóu coustat dóu levant, que douno dounc vers Mouriés, se pòu remira la longo faciado que s'acabo au sud e à l'uba pèr uno toure que l'embaso n'es plus espesso que li muraio.

La toure dóu levant que s'aubouro vers lou sud de la faciado es belèu la mai anciano partido de la bastisso. Es elo que porto li cadran tsoulàri.

Semblo segur que, au debana di siècle, s'es mounta un estànci de mai.

Es ço que douno à pensa lou gargai primitiéu que s'atrovo aperiàqui à 3 metre en dessouto de la téulisso. Segound li dire di proupietàri de vuei, la pendo meme de la téulisso sarié estado enversado. Dins la memo toure, uno duberturo semblarié d'èstre uno aubarestiero mai es belèu plaçado un pau trop bas dins la mu-raio.

Jouiouso Gàrdi un tèms fuguè moulinde farino. L'aigo venié di font de Mouriés que passavon alor souto la bastisso , dins l'alo levanteso de la faciado. Fai pas quaranto an se poudié vèire encaro li soubro dóu moulin de farino emé sis aigo que passavon dessouto. Lis aigo soun estado desaviado e li font de Mouriés rajon aro plus liuen.

La pèiro de molo que se pòu vèire es estado descuberto sus la plaço meme dóu moulin.

Un pau d'istòri

En 1470 Lou rèi Reinié d'Anjou, comte de Prouvènço .fai basti un castèu o pul-èu uno toure de gàrdi, agachoun en avançado di Baus. Li gàrdi que ié restèron èron pulèu galo-bon-tèms ! d'aqui, se dis, lou noum baia à la bastisso. Jouiouso Gàrdi, mai es belèu rèn que de legendo !.

Aquelo toure de gàrdi fuguè aubourado dóu tèms que se bastissié lou castèu de Tarascoun.

En 1480 Lou rèi Reinié defuntè, leissant Jouiouso Gàrdi à sa mouié Jano de Laval.Jano de Laval n'en fai un relais de casso , es en aquéu moumen que la bastisso prenguè soun anamen atuau.

En 1500 pèr lou proumié cop vesènt parèisse lou noum de la famiho de Quiqueran de Beaujeu que vènon planta caviho au castèu.

En 1526 Pèire Quiqueran de Beaujeu que sara evesque de Senez, nasquè au castèu. Escriguè un libre « La Provence louée » ounte pinto d'un biais magistrau la sèuvo e li bèuta dóu relarg dóu castèu de sa jouinesso.

En 1718 lou tenamen de Jouiouso Gàrdi aguè lou flame ounour d'èstre auboura au titre de marquesat. Au noum dóu rèi de Franço, lou du d'Ourleans baiè lou titre au marqués Jousè Pau de Ricard.

En 1761 lou castèu e si terro soun restaca au castèu de Villepail que soun proupietàri n'es Eugèni de Loulaye de Villepail, comte de Bourbon Ligniere.

En 1814 Le comte d 'Emailly croumpo lou castèu pèr assaja de n'en faire un fougau bourgés coume èro de modo. Fai tounba li mountant di fenèstro, fai durbi de porto aqui que n'i avié jamai agu, escafant de soun mies touto semblanço emé lou passat.

En 1880 La Grand Vaquiero coumto dins soun tenamen :

La casso de santo Fe , la casso de Chambremont, em'aquelo de Sant Ubert, lou mas de Crau-Loungueto, lou mas de Mailly emai aquéu de la Fourbino, lou cast-èu de Villepail , lou mas de Bontèms.e Jouiouso Gàrdi.

Acò fasié 4000 eitaro.

Mes en vendo à l'encan, venguèron croumpa pèr Moussu Lucas-Mimbelli.

En 1962 Moussu Calet croumpo Jouiouso Gàrdi dins l'estigança de basti pèr sis oubrié de loujamen proche, lis oubrié menant la palunaio de santo Fe .

La rodo viro.

Après tant de boulegadisso, quau vous a pas di que, dempièi quàuquis annado es tournamai la famiho Quiqueran de Beaujeu , un di darrié sagatun de l'antico lignado qu'a repres lou doumaine.

Lou proupietàri de vuei se douno proun peno pèr radouba l'oustau de si rèire en ié baiant de soun mies soun carage primitiéu. Levant la terro rapourtado davans la bastisso ;Vira de caire tambèn lou betoun que desgraciavo lou doumaine, lis envans tambèn dispareigu, lou castèu segnourejo aro dins un campèstre verdejant.

Se pou tira uno capelado i jouini proupietàri d'encuei que, pousant belèu dins un racinage forço aliuencha , sabon, emé paciènci e amour remetre e serva dins soun bèu aquelo bastisso.

Lou mas de Farinoun

Lou tenamen de Farinoun bourdejo la nacionalo 113 entre Seloun e Sant Martin de la Crau. Lou mas es basti au founs d'uno lèio de platano grandarasso que, l'estiéu, douno uno ombro requisto e precioso, au printemps proun d'obro pèr lou rebroundage e pèr leva li branco toumbado dins li chavanasso invernal.

Maugrat que siegue auboura sus lou terrièr sant-martinen, lou mas paments es proupietàri de la coumuno de Seloun, en seguito d'uno douno que faguè Madamo Le Gigan-Durand que n'èro proupietàri. La rendo annalo degudo pèr li loucatàri es utilizado pèr lou municipe de Seloun , d'en proumié pèr coumpli cado annado li radoubamen necite,li soubro estènt pièi remesso en d'obro caritalo de la vilo. La famiho Gigan-Durand èron de Seloun moute fasien coumèrci de saboun e d'òli.

Dins la bastisso talo que se vèi aro, se podon destria tres epoco de coustrucioun diferento. La partido la mai anciano dato de 1618, acò es afourti pèr la dato es-cricho sus uno lauso dins la proumièro salo. Aquéu membre baumelu emé sa pilo dins lou cantoun èro la cousino de l'oustau proumié.

Uno chaminèio ócupo touto la paret. Lou canoun es basti en de foro emé de bèlli pèiro taiado aparento.

Sus uno embaso de code amourteira, li bèlli pèiro taiado mounton e fan vouto. Au founs uno paret coudouliero desseparo lou segound membre dóu sòu malouna de gros carrèu carra, coume antan èron. Sus la paret dóu founs,se devino, en-negrado, la plaço de l'anciano chaminèio. Dóu coustat dóu levant,se pòu vèire

encaro dis soun bèu , l'ancian estable pèr li chivau. Aquelo salo baumeludo douno vèire de bèllis arcaduro. La dato marcado sus la clau de vouto atesto soun age :1767.

Lou mas tirarié soun noum, acò se dis sènso ges de provo,d'un moulin de farino que ié sarié esta basti.

Lou mas fuguè mena mai de 80 an à de reng pèr la famiho Roux. Proumié lou rèire-grand Teoufile,pièi lou grand, Casimir, Fourtuna lou paire, e enfin lou darrié Maruis.

Lou rèire avié agu parla dóu mas dóu tèms qu'èro un relais ; bord que i'avié travaia pèr oubrié avans que de n'en veni lou meinagié en 1903.

La bastisso emé li terro fuguèron croumpado pèr lou baroun Odon de Samatan en 1837.

Lis alo de cade coustat de la bastisso èron lou recate di carreto e di diligènci. Countavo, lou rèire Teoufile, que, quouro intrè au mas, soubravo encaro mànti marco de rodo e de pesado de chivau vers la porto que, de l'envans, douno dins l'estable, porto aro muraiado.

Li dire d'aquéi ome, trasmés pèr tradicioun de bouco, fan mencioun d'un camin que, venènt de la Crau,bessai de mai liuen, passavo pèr lou relais, tiravo pièi vers l'uba en drechiero di mas de Farinoun e de Vaquiero.

Tant se poudrié que s'agissèsse dóu famous camin pessounié que, dóu Martegue anavo en Avignoun adurre lou pèis au palais di papo.

En 1837 lou mas coumtavo 400 eitaro. Dins l'entre-guerro, l'armado faguè sièuno aperaqui 140 eitaro fin d'alesti un terren pèr sis avioun.

Acò fai que la famiho Roux menavo plus que 260 eitaro. Li pradarié fuguèron semenado pèr lou grand Casimir que bastiguè perèu l'envans di téule plat.

Li falabreguié qu'èron planta en lèio fasien un pau souspresso mai semblarié que lou baroun afeciouna pèr aquélis aubre lis aguèsse vougu pèr soun plesi.

S'arrivo au mas pèr davans la partido la mai mouderno ,aquelo que aro es abitado

Li grands escalié mènou au bescaume. Emai siguèsse basti à la mouderno paments la porto d'intrado se duerb sus un courredou emé au founs lis escalié que van i chambro, coume dis li mas tradiciounau. Un soulet estànci.

Dins lou courredou à man gauch, la cousino emé au founs ço que devié èstre antan la souiardo ; es aro un membre bèn poulidet e acuiènt. A man drecho la grand salo.

Li plafons soun tras que aut, coume èro de modo dis lis annado 1900.

Li mur soun pinta de fresco que representon de scene de casso.

Lou mantèu de la chaminèio tout de bos, prouvable de nouguié ,porto escrinçelado la soupièro garnido coume sus li bèu muble prouvençau dóu siècle passa.

Li carrèu de ceramico ,blanc e verd, de l'encastre de la chaminèio soun pas , éli, dis l'estile dóu país, e nimai lis envans que sa téulisso di quatre aigo se vèi pas au nostre.

Dins la grand salo la suspensioun de ferre farga grandarasso alumino la peço emé si noumbróusi lampo forço poulido dins soun estu de vèire ancian e de ferre farga.

Sus la faciado levanteso lou pijounié fai belèu provo que, d'ùni demié li gènt que ié restèron èron de la noublesso.

Lou mas coume tóuti a bèn chanja soun biais de vièure au debana di siècle.

Li pèd de vigne an dispareigu leissant plaço i pradarié.

Lou fen servira à-n-abarri li tau espagnòu qu'anaran pièi courre dins li corridà, perèu vaco e vedéu pèr la boucharié.

Moussu e Dono Granier que reston au mas à l'ouro d'aro soun li felen de M.Granier que ,vengu au mas qu'avié à peno sege , ié demourè touto sa vido.

Sabèn qu'èro un desir de la proupietàri que lis enfant de Moussu Granier countunièsson après éu de fatura lou tenamen.

QUICHO CLAU

Soun toujours aqui, li vièi mas... e long-tèms encaro tendran targo i siècle rousigaire. Pamens, l'avèn vist souvènt dins nòsti recerco au debana de l'an, pèr faire fàci i besoun de la vido de vuei, soun esta mena à-n-ajougne à sis ativeta tradi-ciounalo, d'àutris ativeta mai mouderno.

Se noste estùdi aqui s'arresto, es que, de l'abitage de nòsti tèms, tóuti n'en couneissèn lis avantage e li desfèci.

Lis ome an leissa li campagno, forço fourçado se soun amoulouna dins li vilo, dins lis oustalas gigantas bourdejant de carriero brounzinanto dóu trafé dis autò.

Quàuquis un, regretous dóu cèu blu e de la campagno, van passa sa dimenchado au cabanoun.

De qu'èi un cabanoun ?

« Es un maset ounte l'on de regalo

En galejant urous e sèns façoun... »

Lou counfort i'es souvènt de manco mai la naturo es aqui !

E pièi.. avisas-vous !

Se d'asard, d'enfant se retrobon... dins uno pinedo , dins soun bos o tout simplamen dins un jardin...à la campagno... regardas-lèi.. qu'acampon de branco... que li tancon dins lou sòu ! e que , pèr dessus ié meton de ramado.. ; pèr téulisso !

Vaqui pas que, sènso que l'agon après... sènso manco n'agué doutanço...

An refa lou geste anti di rèire-rèire de si rèire...

Soulet, pèr jo, pèr rire e s'amusa... pousant beléu dis la souto memòri enfouigado deins si founsi racino... se soun basti..

UNO CABANO !!

<http://www.lpl.univ-aix.fr/ciel/>

Tèste integrau

C.I.E.L. d'Oc

Centre International de l'Écrit en Langue d'Oc

Sèti souciau:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1999